

Nilai dagangan Malaysia cecah RM216.4 bilion pada Julai 2023

KUALA LUMPUR - Malaysia mencatat jumlah perdagangan bernilai RM216.4 bilion bagi Julai 2023 berbanding RM222.1 bilion pada Jun dengan eksport dan import, masing-masing pada RM116.8 bilion dan RM99.7 bilion.

Menurut Jabatan Perangkaan Malaysia (DOSM), Pulau Pinang kekal sebagai pengeksport utama dengan sumbangan sebanyak RM39.6 bilion atau 33.9 peratus daripada jumlah eksport negara (Jun 2023: 33.2 peratus).

Ia diikuti oleh Johor sebanyak 19.6 peratus, Selangor (17.8 peratus), Sarawak (7.0 peratus) dan Kedah (4.4 peratus), kata Ketua Perangkawan Malaysia, Datuk Seri Dr Mohd Uzir Mahidin.

Prestasi eksport Malaysia pada Julai lalu bernilai RM116.8 bilion, menurun sebanyak RM17.6 bilion (-13.1 peratus) berbanding bulan sama pada tahun sebelumnya.

Bagi import, Selangor terus mendominasi import Malaysia menyumbang 27.8 peratus (Jun 2023: 25.8 peratus).

Prestasi itu disusuli oleh Johor yang mencatat 22.9 peratus, Pulau Pinang (19.6 peratus), Kuala Lumpur (7.2 peratus) dan Sarawak (5.0 peratus).

"Import pada Julai lalu menurun RM18.8 bilion (-15.9 peratus) berbanding bulan sama pada tahun sebelumnya," katanya. - Bernama



Eksport bagi enam negeri mencatatkan peningkatan pada Julai 2023.